



Usvojena i potpisana 23.09. 2005.godine  
Bosanski

Sastanak na visokom nivou ministara unutrašnjih poslova, ministara sigurnosti i visokih zvaničnika vlada i uprava iz Jugoistočne Evrope o Regionalnoj strategiji o sredstvima borbe protiv organiziranog i privrednog kriminala

## **ZAJEDNIČKA DEKLARACIJA**

23. SEPTEMBAR / RUJAN 2005.GODINE

Brijuni, Hrvatska

***Mi, ministri unutrašnjih poslova i visoki zvaničnici vlada i uprava iz  
Jugoistočne Evrope:***

Učestvujući na ovom sastanku na visokom nivou ministara unutrašnjih poslova, ministara sigurnosti i visokih zvaničnika o Regionalnoj strategiji o sredstvima borbe protiv organiziranog i privrednog kriminala, održanog na Brijunima (23. 9. 2005. godine);

U saradnji sa Vijećem Evrope, Evropskom komisijom i drugim međunarodnim organizacijama,

***u svom službenom svojstvu***

*Pozivajući se na ciljeve, norme i obaveze iz evropskih i drugih međunarodnih standarda za suzbijanje privrednog kriminala, pranja novca, korupcije, trgovine ljudima, krijumčarenja ljudi i drugih oblika organiziranog kriminala i teških oblika kriminala;*

*Priznajući napredak koji su naše zemlje i uprave ostvarile u usklađivanju krivičnog zakonodavstva, te stvaranju i jačanju kapaciteta specijalnih službi krivičnog pravosuđa za rješavanje problema privrednog kriminala, pranja novca, korupcije, trgovine ljudima, krijumčarenje ljudi i drugih oblika organiziranog kriminala i teških oblika kriminala;*

*Priznajući neodložnu potrebu da se naš zakonodavni i institucionalni okvir i dalje unapređuje i proširuju kapaciteti za učinkovitiju provedbu zakona i drugih propisa;*

*Uvažavajući sličnosti i razlike, te regionalni karakter izazova pred kojima se nalazimo, pri čemu vjerujemo da je za efikasnu borbu protiv teških krivičnih djela potrebna još jača i funkcionalnija regionalna i međunarodna saradnja;*

*Polazeći od Izjave iz Londona iz novembra 2002. godine, Procesu stabilizacije i pridruživanja, te drugih obaveza, napora, naučenih lekcija i iz njih stečenih iskustava;*

*Potvrđujući svoju obavezu da u naporima na suzbijanju teških krivičnih djela poštujemo međunarodne instrumente za zaštitu ljudskih prava, a posebno Konvenciju o zaštiti ljudskih prava i osnovnih sloboda, kao i sudsku praksu Evropskog suda za ljudska prava;*

*Podržavajući nalaze radnih grupa i eksperata u okviru CARPO zajedničkog projekta Vijeća Evrope i Evropske komisije;*

*Vjerujući da cjelovita sveobuhvatna javna politika i djelovanje u borbi protiv teških krivičnih djela treba da bude zasnovana na znanju i utemeljena na obavještajnim podacima prikupljenim putem strukturiranog okvira za sistematsko prikupljanje, analizu i obradu podataka u skladu sa evropskim standardima zaštite ličnih podataka;*

*Saglasni* da usmjeravanje ka koristi stečenoj krivičnim djelima u borbi protiv teških krivičnih djela kroz finansijske istrage koje vode do identifikacije, privremenog oduzimanja i oduzimanja imovinske koristi stečene krivičnim djelima čini sastavni dio svake sveobuhvatne strategije protiv teških krivičnih djela;

*Prihvatajući* da, ako će adekvatno odgovoriti na problem kriminala u svim njegovim savremenim oblicima i varijacijama, agencije za provedbu zakona moraju primijeniti efikasna sredstva i savremene policijske strategije u postupku otkrivanja, istrage i gonjenja, uključujući posebna istražna sredstva, kroz sveobuhvatan pravni okvir i odgovarajuću institucionalnu strukturu sa efikasnim mehanizmima kontrole i sudskog nadzora;

*Svjesni* da je razrađen sistem mjera za efikasnu zaštitu svjedoka i saradnika pravosuđa prije, tokom i nakon krivičnog postupka neophodan instrument za uspješnu istragu i gonjenje teških krivičnih djela, kao i obaveza krivičnog pravosudnog sistema prema svjedocima i žrtvama zločina;

*Vjerujući* da teški oblici transnacionalnog kriminala predstavljaju izazov sa kojim se zemlje ne mogu same suočiti i da međunarodna i uzajamna saradnja u krivičnim stvarima igra ključnu ulogu u općem okviru odnosa među državama i jurisdikcijama kako na evropskom tako na međunarodnom planu u ovom pogledu

**usvajamo**

**REGIONALNU STRATEGIJU O SREDSTVIMA BORBE PROTIV ORGANIZIRANOG I PRIVREDNOG KRIMINALA predstavljenu na ovom sastanku**

**i**

**obavezujemo se da ćemo:**

U skladu sa ciljevima i mjerama utvrđenim u Strategiji,

- poboljšavati svoj pravni okvir i institucionalne kapacitete u oblasti kriminalističke analitike i kriminalističko - obavještajnog sistema,
- promovirati uvođenje i ostvarivanje u svom sistemu provedbe zakona i krivičnog pravosuđa pojma integrirane finansijske i krivične istrage koja ima za cilj oduzimanje koristi stečene kriminalnom aktivnošću,
- nastaviti sa povećavanjem svojih kapaciteta za korištenje posebnih istražnih sredstava za otkrivanje i istragu teških krivičnih djela, istovremeno se u njihovom korištenju pridržavajući strogih principa zakonitosti, proporcionalnosti, proceduralne zaštite i mehanizma nadzora,

- nastaviti s naporima na izgradnji sveobuhvatnog sistema zaštite svjedoka, ugroženih žrtava i saradnika pravosuđa prije, tokom i nakon krivičnog postupka,
- jačati svoje kapacitete u cilju ostvarivanja jednog funkcionalnog sistema regionalne i međunarodne saradnje u krivičnim stvarima.

Osigurati bilateralnu i multilateralnu regionalnu saradnju i primjenu naučenih lekcija iz regiona u realizaciji Strategije, uz istovremeno promoviranje napora na izradi rješenja koja su namijenjena specifičnostima problema lokalnog nivoa;

Zagovarati dodatna izdvajanja iz budžetskih fondova kako bi se osigurao nastavak i uspješno ostvarivanje ciljeva Strategije;

Nastaviti sa naporima na pomaganju i učestvovanju u projektima usmjerenim ka realizaciji ciljeva Strategije na dosljedan način;

Redovno kontrolirati postignuti napredak i u tom cilju sastati se ponovo u septembru 2006. godine u Sarajevu.

Brijuni, 23. Septembar / rujan 2005. godine

*G-din. Sokol OLLDASHI*  
*Ministar unutrašnjih poslova* .....

*G-din. Bariša ČOLAK*  
*Ministar sigurnosti* .....

*G-din. Ivica KIRIN*  
*Ministar unutrašnjih poslova* .....

*G-din. Ljubomir MIHAJLOVSKI*  
*Ministar unutrašnjih poslova* .....

*G-din. Dragan DJUROVIĆ*  
*Zamjenik premijera*  
*Ministar unutrašnjih poslova* .....

*G-din. Dragan JOČIĆ*  
*Ministar unutrašnjih poslova* .....

*G-din. Jean DUSSOURD* .....

*Zamjenik specijalnog predstavnika*  
*generalnog sekretara za policiju i pravosuđe UNMIK*